



PROGRAM
SUFINANCIRANJA SAMOZAPOSŁJAVANJA – START UP 2026

Sarajevo, februar/veljača 2026. godine

SADRŽAJ

1.	Osnov za donošenje, izvor finansiranja i nosioci realizacije Programa	3
2.	Cilj Programa.....	3
3.	Ciljna grupa.....	3
4.	Način sufinanciranja.....	3
5.	Poticajne mjere	4
5.1.	<i>Poduzetništvo za mlade 2026</i>	4
5.2.	<i>Poduzetništvo za žene 2026</i>	5
5.3.	<i>Poduzetništvo za sve 2026</i>	5
5.4.	<i>Poduzetništvo za demobilizirane branioce/branitelje 2026</i>	5
6.	Raspodjela sredstava za realizaciju Programa	6
7.	Priprema za realizaciju Programa	8
8.	Javni poziv	8
9.	Registracija nezaposlene osobe	8
10.	Prijava na javni poziv	9
11.	Registracija pravnog lica/poslodavca na portalu Zavoda	9
12.	Provjera podataka i potpisivanje ugovora sa korisnicima sredstava	10
13.	Pravdanje i isplata odobrenih sredstava	11
14.	Opće napomene	12
15.	Kontrola i praćenje izvršenja ugovornih obaveza	13
16.	Indikatori za praćenje realizacije (monitoring) i ocjenu uspješnosti efekata mjera (evaluaciju)	13

1. Osnov za donošenje, izvor finansiranja i nosioci realizacije Programa

U skladu sa Zakonom o posredovanju u zapošljavanju i socijalnoj sigurnosti nezaposlenih osoba („Službene novine Federacije BiH“, br. 41/01, 22/05 i 9/08), Strategijom jačanja funkcije posredovanja u javnim službama za zapošljavanje u Federaciji BiH, Strategijom zapošljavanja u Federaciji BiH 2023-2030 („Službene novine Federacije BiH“, broj: 94/23), ciljevima iz Programa rada Federalnog zavoda za zapošljavanje za 2026. godinu i Trogodišnjeg plana rada Federalnog zavoda za zapošljavanje 2026-2028, sačinjen je Program sufinansiranja samozapošljavanja - Start up 2026 (u daljem tekstu: Program).

Za realizaciju Programa predviđena su sredstva u iznosu od 18.000.000,00 KM u skladu sa Finansijskim planom za 2026. i procjenom za 2027. i 2028. godinu.

Upravni odbor Zavoda će u toku realizacije, u opravdanim situacijama odlučivati o eventualnim promjenama iz ovog programa.

Federalni zavod za zapošljavanje (u daljem tekstu: Zavod) realizira Program u saradnji sa kantonalnim/županijskim službama za zapošljavanje (u daljem tekstu: Služba/službe).

Izrazi u ovom dokumentu koji su napisani samo u jednom gramatičkom rodu odnose se podjednako na muški i ženski rod.

2. Cilj Programa

Poticanje najmanje **1350 osoba** sa evidencije nezaposlenih u Federaciji BiH na samozapošljavanje, pokretanjem samostalne djelatnosti/privrednog društva, kao i na zapošljavanje drugih osoba sa evidencije nezaposlenih u pokrenutim djelatnostima/društvima.

3. Ciljna grupa

Ciljna grupa su osobe, prijavljene na evidenciju nezaposlenih u Federaciji BiH prije dana objave Javnog poziva, bez obzira na stepen obrazovanja i starosnu dob, a koje će nakon prijave na Javni poziv registrirati u Federaciji BIH, nezavisno od mjesta/kantona prebivališta i održati samostalnu djelatnost/privredno društvo u trajanju od najmanje 12 mjeseci.

U Programu ne mogu učestvovati osobe koje su po Javnom pozivu iz **2023., 2024. i 2025.** godine koristile poticajna sredstva iz mjera za pokretanje samostalne djelatnosti/privrednog društva, u čijoj realizaciji su učestvovali Zavod/službe, kao ni osobe koje su odjavile djelatnost/društvo u periodu od šest (6) mjeseci prije objave Javnog poziva za učešće u ovom programu.

4. Način sufinansiranja

Programom je predviđeno sufinansiranje troškova doprinosa, a u slučaju da je iznos sufinansiranja veći od troškova doprinosa, ostatak iznosa sufinansiranja se koristi za isplatu dijela neto plaće.

Zavod poslodavcu, po dostavljenom pravdanju, refundira određeni iznos koji je definiran svakom mjerom zasebno.

Osnovni iznos sufinansiranja samozapošljavanja i zapošljavanja dodatnih osoba, u svim mjerama se bez kumulativnog zbrajanja povećava za 10% za sljedeće kategorije nezaposlenih osoba:

- radno sposobne osobe sa invaliditetom (dokaz - uvjerenje instituta za medicinsko vještačenje),
- članovi šehidskih porodica ili porodica poginulih branitelja (dokaz - uvjerenje BIZ-a ili drugi relevantan dokaz),

- nezaposleni demobilizirani borci/razvojačeni branitelji (dokaz - relevantna dokumentacija) – ne primjenjuje se na mjeru Poduzetništvo za demobilizirane branioce/branitelje 2026,
- djeca nezaposlenih demobiliziranih boraca/razvojačenih branitelja, (dokaz - uvjerenje BIZ-a ili druga relevantna dokumentacija),
- djeca i supružnici osoba s invaliditetom od 60% i više (dokaz - uvjerenje općine),
- Članovi domaćinstva u kojem nijedan član nije zaposlen podrazumijevaju domaćinstvo u kojem nijedna osoba ostvaruje prihod po osnovu radnog odnosa. Status se dokazuje sljedećom dokumentacijom: uvjerenjem nadležnog općinskog organa – Izjavom o zajedničkom domaćinstvu (kućna lista), uz dostavljanje uvjerenja nadležnog biroa za zapošljavanje o nezaposlenosti osoba navedenih u izjavi ili uvjerenja Porezne uprave Federacije BiH da osobe iz izjave nisu poreski obveznici. Ukoliko se u Izjavi kandidirane osobe nalazi član domaćinstva koji je korisnik penzije PIO/MIO Federacije BiH, navedeni kandidat ne može ostvariti pravo na sufinanciranje odnosno uvećani iznos sufinansiranja zapošljavanja,
- Romi (dokaz - ovjerena izjava o pripadnosti romskoj nacionalnoj manjini),
- samohrani roditelji, staratelji i hranitelji i njihove djece (dokaz - uvjerenje centra za socijalni rad),
- roditelji djeteta sa posebnim potrebama i roditelji teško bolesne djece (dokaz - uvjerenje centra za socijalni rad, druga relevantna dokumentacija),
- žrtve nasilja, žrtve nasilja u obitelji i djeca žrtava nasilja, civilne žrtve rata i dr. (dokaz - uvjerenje centra za socijalni rad, MUP-a, suda, te sigurne kuće),
- liječeni ovisnici (dokaz - uvjerenje specijalizirane medicinske ustanove, uvjerenje komune),
- bivši štíćenici doma za nezbrinutu djecu (dokaz - uvjerenje doma za nezbrinutu djecu, uvjerenje centra za socijalni rad).

5. Poticajne mjere

5.1. Poduzetništvo za mlade 2026

Sufinanciranje samozapošljavanja mladih, dobi do 30 godina, bez obzira na spol, radno iskustvo i stepen obrazovanja, prijavljenih na evidenciju nezaposlenih prije dana objave Javnog poziva/aktiviranja liste prijava „na čekanju“, radi pokretanja i registracije samostalne djelatnosti/privrednog društva.

Zavod će mladim, tj. korisnicima sredstava, sa kojima se zaključi ugovor o sufinansiranju samozapošljavanja, bez obzira na vrstu djelatnosti/društvo, u narednih 12 mjeseci isplaćivati poticajna sredstva u iznosu od **950 KM** (mjesečno).

Navedeni iznos se uvećava za dodatnih **50 KM** mjesečno na ime refundacije dijela troškova pokretanja djelatnosti/društva.

Ukoliko korisnik u okviru pokrenute djelatnosti/društva, osim sebe zaposli i drugu osobu, prijavljenu na evidenciju nezaposlenih prije dana objave Javnog poziva/aktiviranja liste prijava „na čekanju“, mjesečno će mu se isplaćivati/refundirati sredstva u iznosu od **850 KM** po svakoj zaposlenoj osobi, bez obzira na dob, radno iskustvo i stepen obrazovanja u trajanju od 12 mjeseci.

U ovoj mjeri mogu sudjelovati samo osobe koje na dan objave Javnog poziva nemaju navršenih 30 godina života.

Za realizaciju ovu mjere predviđena su sredstva u iznosu od **4.000.000 KM**.

5.2. Poduzetništvo za žene 2026

Sufinanciranje samozapošljavanja žena, bez obzira na dob, radno iskustvo i stepen obrazovanja, prijavljenih na evidenciju nezaposlenih prije dana objave Javnog poziva/aktiviranja liste prijava „na čekanju“, radi pokretanja i registracije samostalne djelatnosti/privrednog društva.

Zavod će ženama, tj. korisnicima sredstava, sa kojima se zaključi ugovor o sufinansiranju samozapošljavanja, bez obzira na vrstu djelatnosti/društvo, u narednih 12 mjeseci isplaćivati poticajna sredstva u iznosu od **900 KM** (mjesečno).

Navedeni iznos se uvećava za dodatnih **50 KM** mjesečno na ime refundacije dijela troškova pokretanja djelatnosti/društva.

Ukoliko korisnica u okviru pokrenute djelatnosti/društva, osim sebe zaposli i drugu osobu/ženu, prijavljenu na evidenciju nezaposlenih prije dana objave Javnog poziva/aktiviranja liste prijava „na čekanju“, mjesečno će mu se isplaćivati/refundirati sredstva u iznosu od **850 KM** po svakoj zaposlenoj osobi/ženi, bez obzira na dob, radno iskustvo i stepen obrazovanja u trajanju od 12 mjeseci.

Za realizaciju ovu mjere predviđena su sredstva u iznosu od **4.500.000 KM**.

5.3. Poduzetništvo za sve 2026

Sufinanciranje samozapošljavanja osoba, bez obzira na dob, radno iskustvo i stepen obrazovanja, prijavljenih na evidenciju nezaposlenih prije dana objave Javnog poziva/aktiviranja liste prijava „na čekanju“, radi pokretanja i registracije samostalne djelatnosti/privrednog društva.

Zavod će nezaposlenim osobama, tj. korisnicima sredstava, sa kojima se zaključi ugovor o sufinansiranju samozapošljavanja, bez obzira na vrstu djelatnosti/društvo, u narednih 12 mjeseci isplaćivati poticajna sredstva u iznosu od **870 KM** (mjesečno).

Navedeni iznos se uvećava za dodatnih **50 KM** mjesečno na ime refundacije dijela troškova pokretanja djelatnosti/društva.

Ukoliko korisnik u okviru pokrenute djelatnosti/društva, osim sebe zaposli i drugu osobu, prijavljenu na evidenciju nezaposlenih prije dana objave Javnog poziva/aktiviranja liste prijava „na čekanju“, mjesečno će mu se isplaćivati/refundirati sredstva u iznosu od **850 KM** po svakoj zaposlenoj osobi, bez obzira na dob, radno iskustvo i stepen obrazovanja u trajanju od 12 mjeseci.

Za realizaciju ovu mjere predviđena su sredstva u iznosu od **6.000.000 KM**.

5.4. Poduzetništvo za demobilizirane branioce/branitelje 2026

Sufinanciranje samozapošljavanja osoba, u skladu sa članom 2. Zakona o pravima demobiliziranih branilaca i članova njihovih porodica („Službene novine Federacije BiH“, broj 54/19), i to demobiliziranih branilaca/branitelja i demobiliziranih branilaca/branitelja dobrovoljaca, bez obzira na spol, dob, radno iskustvo i stepen obrazovanja, prijavljenih na evidenciju nezaposlenih prije dana objave Javnog poziva/aktiviranja liste prijava „na čekanju“, radi pokretanja i registracije samostalne djelatnosti/privrednog društva.

Zavod će nezaposlenim osobama, tj. korisnicima sredstava, sa kojima se zaključi ugovor o sufinansiranju samozapošljavanja, bez obzira na vrstu djelatnosti/društvo, u narednih 12 mjeseci isplaćivati poticajna sredstva od **900 KM** (mjesečno) za demobilizirane branioce/branitelje, odnosno **930 KM** (mjesečno) za demobilizirane branioce/branitelje

dobrovoljce koji su kao maloljetni dobrovoljno stupili u oružane snage u periodu od 18.9.1991. godine do 22.4.1996. godine (član 2. stav 2. Zakona o pravima demobiliziranih branilaca i članova njihovih porodica).

Navedeni iznos se uvećava za dodatnih **50 KM** mjesečno na ime refundacije dijela troškova pokretanja djelatnosti/društva.

Ukoliko korisnik u okviru pokrenute djelatnosti/društva, osim sebe zaposli i drugu osobu, prijavljenu na evidenciju nezaposlenih prije dana objave Javnog poziva/aktiviranja liste prijava „na čekanju“, mjesečno će mu se isplaćivati/refundirati sredstva u iznosu od **850 KM** po svakoj zaposlenoj osobi, bez obzira na dob, radno iskustvo i stepen obrazovanja u trajanju od 12 mjeseci.

Za realizaciju ovu mjere predviđena su sredstva u iznosu od **500.000 KM**.

6. Raspodjela sredstava za realizaciju Programa

Tabela 1: Okvirna raspodjela sredstava po kantonima/županijama za sve mjere

KANTON/ŽUPANIJA	Nezaposlene osobe (31.12.2025.)	70% prema broju nezaposlenih	30% linearno	UKUPNO
1. Unsko-sanski	25.599	1.271.965	540.000	1.811.965
2. Posavski	3.498	173.809	540.000	713.809
3. Tuzlanski	60.085	2.985.508	540.000	3.525.508
4. Zeničko-dobojski	46.471	2.309.054	540.000	2.849.054
5. Bosansko-podrinjski	2.451	121.785	540.000	661.785
6. Srednjobosanski	28.776	1.429.824	540.000	1.969.824
7. Hercegovačko-neretvanski	24.062	1.195.594	540.000	1.735.594
8. Zapadnohercegovački	9.708	482.372	540.000	1.022.372
9. Kanton Sarajevo	47.463	2.358.345	540.000	2.898.345
10. Kanton 10	5.469	271.744	540.000	811.744
UKUPNO	253.582	12.600.000,00	5.400.000,00	18.000.000

Tabela 2: Raspodjela sredstava po kantonima/županijama za mjeru: Poduzetništvo za mlade 2026

KANTON/ŽUPANIJA	Nezaposlene osobe (31.12.2025.)	70% prema broju nezaposlenih	30% linearno	UKUPNO
1. Unsko-sanski	25.599	353.324	150.000	503.324
2. Posavski	3.498	48.280	150.000	198.280
3. Tuzlanski	60.085	829.308	150.000	979.308
4. Zeničko-dobojski	46.471	641.404	150.000	791.404
5. Bosansko-podrinjski	2.451	33.829	150.000	183.829
6. Srednjobosanski	28.776	397.173	150.000	547.173
7. Hercegovačko-neretvanski	24.062	332.110	150.000	482.110
8. Zapadnohercegovački	9.708	133.992	150.000	283.992
9. Kanton Sarajevo	47.463	655.096	150.000	805.096
10. Kanton 10	5.469	75.484	150.000	225.484
UKUPNO	253.582	3.500.000,00	1.500.000,00	5.000.000

Tabela 3: Raspodjela sredstava po kantonima/županijama za mjeru: Poduzetništvo za žene 2026

KANTON/ŽUPANIJA	Nezaposlene osobe (31.12.2025.)	70% prema broju nezaposlenih	30% linearno	UKUPNO
-----------------	------------------------------------	------------------------------------	-----------------	--------

1. Unsko-sanski	25.599	388.656	165.000	553.656
2. Posavski	3.498	53.108	165.000	218.108
3. Tuzlanski	60.085	912.238	165.000	1.077.238
4. Zeničko-dobojski	46.471	705.544	165.000	870.544
5. Bosansko-podrinjski	2.451	37.212	165.000	202.212
6. Srednjobosanski	28.776	436.893	165.000	601.893
7. Hercegovačko-neretvanski	24.062	365.320	165.000	530.320
8. Zapadnohercegovački	9.708	147.391	165.000	312.391
9. Kanton Sarajevo	47.463	720.605	165.000	885.605
10. Kanton 10	5.469	83.033	165.000	248.033
UKUPNO	253.582	3.850.000,00	1.650.000,00	5.500.000

Tabela 4: Raspodjela sredstava po kantonima/županijama za mjeru: Poduzetništvo za sve 2026

KANTON/ŽUPANIJA	Nezaposlene osobe (31.12.2025.)	70% prema broju nezaposlenih	30% linearno	UKUPNO
1. Unsko-sanski	25.599	494.653	210.000	704.653
2. Posavski	3.498	67.592	210.000	277.592
3. Tuzlanski	60.085	1.161.031	210.000	1.371.031
4. Zeničko-dobojski	46.471	897.966	210.000	1.107.966
5. Bosansko-podrinjski	2.451	47.361	210.000	257.361
6. Srednjobosanski	28.776	556.043	210.000	766.043
7. Hercegovačko-neretvanski	24.062	464.953	210.000	674.953
8. Zapadnohercegovački	9.708	187.589	210.000	397.589
9. Kanton Sarajevo	47.463	917.134	210.000	1.127.134
10. Kanton 10	5.469	105.678	210.000	315.678
UKUPNO	253.582	4.900.000,00	2.100.000,00	7.000.000

Tabela 5: Raspodjela sredstava po kantonima/županijama za mjeru: Poduzetništvo za demobilizirane branioce/branitelje 2026

KANTON/ŽUPANIJA	Nezaposlene osobe (31.12.2025.)	70% prema broju nezaposlenih	30% linearno	UKUPNO
1. Unsko-sanski	25.599	35.332	15.000	50.332
2. Posavski	3.498	4.828	15.000	19.828
3. Tuzlanski	60.085	82.932	15.000	97.932
4. Zeničko-dobojski	46.471	64.140	15.000	79.140
5. Bosansko-podrinjski	2.451	3.383	15.000	18.383
6. Srednjobosanski	28.776	39.717	15.000	54.717
7. Hercegovačko-neretvanski	24.062	33.211	15.000	48.211
8. Zapadnohercegovački	9.708	13.399	15.000	28.399
9. Kanton Sarajevo	47.463	65.510	15.000	80.510
10. Kanton 10	5.469	7.548	15.000	22.548
UKUPNO	253.582	350.000,00	150.000,00	500.000

Zavod će, zavisno od stanja i potreba na tržištu rada, odlučivati o eventualno neutrošenim sredstvima tokom realizacije Programa, odnosno njihovoj relokaciji unutar jednog programa.

U slučaju postojanja potreba za relokacijama na relaciji između različitih programa i /ili kantona, Upravni odbor će, donositi odluke o eventualnoj izmjeni budžeta, u skladu sa iskazanim potrebama kantona/županija.

7. Priprema za realizaciju Programa

U okviru pripremne faze Programa, Zavod:

- poziva nezaposlene osobe da se obavezno registriraju na web portalu Zavoda: www.fzzz.ba, radi sudjelovanja u Programu,
- informira javnost o Programu najkasnije deset (10) dana prije objave Javnog poziva putem web portala Zavoda: www.fzzz.ba, putem Ureda za odnose s javnošću Vlade Federacije Bosne i Hercegovine, te putem web portala Federalnog ministarstva rada i socijalne politike: www.fmrsp.gov.ba, a po potrebi i putem drugih sredstava javnog informiranja,
- izrađuje obrasce potrebne za realizaciju Programa,
- osigurava softversku aplikaciju za prijavu na Javni poziv,
- potpisuje sa službama Sporazum o međusobnoj suradnji o realizaciji Programa.

Osnovne informacije o postupcima, proceduri i aktivnostima iz Programa, korisnici/-ce Programa dobivaju na portalu Zavoda, te putem telefona i e-maila u službama i Zavodu.

8. Javni poziv

Zavod objavljuje Javni poziv za učešće u Programu putem web portala Zavoda: www.fzzz.ba.

Javni poziv ostaje otvoren tri (3) radna dana.

Nezaposlene osobe se tokom trajanja poziva mogu prijavljivati svaki radni dan u periodu od 8,00 do 16,00 sati.

Zavod odlučuje o datumu objave i visini finansijskih sredstava za svaki Javni poziv.

9. Registracija nezaposlene osobe

Registracija nezaposlene osobe je preduvjet za sudjelovanje iste na javnom pozivu, a koja se mora izvršiti prije podnošenja prijave za sudjelovanje u istom. Registracija nezaposlene osobe je preduvjet za sudjelovanje u javnom pozivu, a koja se mora izvršiti prije podnošenja prijave za sudjelovanje u istom. Nezaposlena osoba se registrira putem linka na web portalu Zavoda: www.fzzz.ba. Prilikom registracije nezaposlena osoba unosi tražene podatke iz obrasca registracije koji se odnose na ime i prezime, matični broj, adresu prebivališta, broj telefona/mobitela, e-mail adresu, korisničko ime i lozinku i ostale podatke koji se traže u obrascu.

Nakon izvršene registracije, nezaposlena osoba na svoju e-mail adresu dobiva automatski generiran e-mail koji sadrži link odabirom kojeg nezaposlena osoba potvrđuje svoju registraciju.

Po uspješno okončanoj registraciji, nezaposlena osoba ubuduće pristupa portalu Zavoda koristeći korisničko ime i lozinku koje je sama odredila prilikom registracije.

Nezaposlena osoba koja se registrirala na portalu Zavoda se prijavljuje na Javni poziv koristeći svoje korisničko ime i lozinku.

Registracija neće biti moguća osam (8) dana prije objave Javnog poziva.

10. Prijava na javni poziv

Nezaposlena osoba (u daljem tekstu: aplikant) se prijavljuje za učešće u Programu odabirom linka na web portalu Zavoda: www.fzzz.ba. Prethodno se mora prijaviti na portalu Zavoda koristeći dodijeljeno korisničko ime i lozinku koje je sam odredio prilikom registracije na portalu Zavoda.

Aplikant se opredjeljuje za odgovarajuću mjeru, nakon čega u obrazac prijave unosi tražene/potrebne podatke.

Aplikant može podnijeti zahtjev i za sufinanciranje zapošljavanja najviše 20 osoba sa evidencije nezaposlenih u Federaciji BiH, po svakom objavljenom Javnom pozivu. U slučaju da se u prijavi navede veći broj osoba od prethodno definiranog, takav zahtjev u prijavi neće biti prihvaćen, te se aplikant obavještava o potrebi izmjene takve prijave.

Po okončanom postupku prijave, aplikant dobije link odabirom kojeg se pojavljuje popunjen obrazac prijave kojeg je aplikant dužan isprintati.

Prijave na Javni poziv se evidentiraju, u realnom vremenu, na portalu Zavoda po datumu i vremenu podnošenja istih.

Sve prijave će, sukladno pravilima Programa, biti provjerene.

U slučaju da nema dovoljno sredstava po određenom zahtjevu iz prijave, prijava se zaprima sukladno visini raspoloživih sredstava u trenutku podnošenja prijave, odnosno, prijava će biti zaprimljena za onaj broj aplikanata za čije sufinanciranje u trenutku podnošenja prijave ima dovoljno raspoloživih sredstava.

Aplikanti koji su se prijavili na Javni poziv, a za čiju realizaciju prijava nije bilo trenutno raspoloživih sredstava, uvrštavaju se na listu čekanja (status prijave: „na čekanju“). Ukoliko je provjerom od strane Službe utvrđeno da ispunjavanju uvjete Programa, isti će biti pozvani na zaključivanje ugovora u slučaju odustajanja nekih aplikanata, za one mjere i kantone gdje su se sredstva učinila raspoloživim.

Ukoliko je aplikant, dok je bio na listi čekanja, registrirao samostalnu djelatnost/privredno društvo do aktiviranja liste čekanja (status prijave: „odobrena“), priznat će mu se pravo na zaključenje ugovora u slučaju oslobađanja sredstava.

Obračun eventualno raspoloživih sredstava za aplikante na listi čekanja će se ažurirati u skladu sa raspoloživim sredstvima.

11. Registracija pravnog lica/poslodavca na portalu Zavoda

Nakon završene registracije samostalne djelatnosti/privrednog društva, aplikant se registrira na web portalu Zavoda: www.fzzz.ba u svojstvu pravnog lica/poslodavca.

Registracija aplikanta (u daljem tekstu: poslodavac) je preduvjet za potpisivanje ugovora o sufinanciranju samozapošljavanja.

Prilikom registracije poslodavac unosi tražene podatke iz obrasca registracije. Nakon izvršene registracije, poslodavac na svoju e-mail adresu dobije automatski generiran e-mail koji sadrži link odabirom kojeg poslodavac potvrđuje svoju registraciju. Zavod provjerava ispravnost unesenih podataka, te u slučaju da podaci nisu ispravni i registracija nije moguća, potrebno je ponovo pristupiti registraciji. Po uspješno okončanoj registraciji, poslodavac ubuduće pristupa portalu Zavoda koristeći korisničko ime i lozinku koje je sam odredio prilikom registracije.

Poslodavac je dužan Službi dostaviti dokaz o izvršenoj registraciji na portalu Zavoda u svojstvu pravnog lica/poslodavca (print screen registracije).

Rok za registraciju na portalu Zavoda je 45 od dana objave Javnog poziva/pokretanja liste čekanja.

12. Provjera podataka i potpisivanje ugovora sa korisnicima sredstava

Služba provjerava kvalificiranost aplikanta za učešće u Programu (status nezaposlenosti na dan objave Javnog poziva, ranije učešće u projektima samozapošljavanja, odjava samostalne djelatnosti/privrednog društva).

Nakon što je Služba provjerom utvrdila koji su od prijavljenih aplikanta kvalificirani za učešće u Programu, Služba će Zavodu učiniti dostupnom informaciju o kvalificiranim aplikantima, po kantonima i mjerama.

Služba poziva kvalificiranog aplikanta da u roku od 45 dana od dana podnošenja prijave na Javni poziv dostavi potrebnu dokumentaciju za zaključivanje ugovora o sufinansiranju samozapošljavanja:

- isprintan i svojeručno potpisan *Obrazac prijave*,
- ovjerenu kopiju rješenja o registraciji djelatnosti/društva, čiji datum izdavanja je nakon datuma podnošenja prijave na Javni poziv,
- kopiju Uvjerenja o poreznoj registraciji (ID broj),
- dokaz o računu (karton deponiranih potpisa, ugovor o tekućem računu sa bankom, ili potvrda o računu),
- dokaz na osnovu kojeg se iznos sufinansiranja povećava za 10% sukladno odredbama Programa,
- dokaz o izvršenoj registraciji na portalu Zavoda u svojstvu pravnog lica/poslodavca (print screen registracije).

U slučaju zapošljavanja dodatne osobe, kvalificirani aplikant dostavlja:

- isprintan i popunjen *Obrazac o sufinansiranim osobama (Obrazac SO)*, ovjeren i potpisan od ovlaštene osobe, koji je dostupan na web portalu Zavoda,
- kopiju ugovora o radu s nezaposlenom osobom koju zapošljava ili s kojom pokreće djelatnost/društvo, prijavljene na puno radno vrijeme u skladu sa odredbama člana 26. Zakona o radu FBiH.
- dokaz na osnovu kojeg se iznos sufinansiranja povećava za 10% sukladno odredbama Programa.

Služba provjerava dostavljenu dokumentaciju, te ukoliko je poslodavac dostavio nepotpunu ili dokumentaciju koja nije odgovarajuća/validna, obavještava istog o eventualnoj potrebi dopune dokumentacije u ostavljenom roku, odnosno o razlozima nepotpisivanja ugovora.

Nakon što poslodavac potpiše i ovjeri sve primjerke ugovora, Služba potpisuje i ovjerava iste te ih dostavlja Zavodu.

Uz primjerke ugovora, Služba Zavodu dostavlja i isprintan i popunjen *Obrazac o sufinansiranim osobama (Obrazac SO)*, ovjeren i potpisan od ovlaštene osobe, koji je dostupan na web portalu Zavoda i dokaz o glavnom računu (potvrda o računu ili ugovor o tekućem računu sa bankom).

Zavod provjerava ugovore i dostavljenu dokumentaciju, a po potrebi može od Službe zatražiti i dodatnu dokumentaciju s ciljem provjere ugovora dostavljenog na potpis. Ukoliko

su svi uvjeti ispunjeni, Zavod potpisuje i ovjerava sve primjerke ugovora, te zadržava jedan (1) primjerak, a ostale vraća Službi.

Za one aplikante koji su imali status prijave „na čekanju“, a u međuvremenu su prešli u status „odobrena“, Zavod će navedenu informaciju učiniti dostupnom Službi a Služba aplikantima. Aplikanti će biti pozvani da se putem e-maila/ili drugim pisanim putem u roku od tri (3) dana izjasne da li žele sudjelovati u Programu. Ukoliko se isti ne izjasne u navedenom roku, smatrat će se da su odustale od sudjelovanja u Programu. Nakon što je Služba provjerom utvrdila koji su od navedenih aplikanata kvalificirani za učešće u Programu, Služba će Zavodu učiniti dostupnom informaciju o kvalificiranim aplikantima, po kantonima i mjerama, nakon čega Služba pristupa proceduri pripreme i potpisivanja ugovora sa aplikantom. Kvalificirani aplikant je u obavezi da registira samostalnu djelatnost/privredno društvo, te da se u svojstvu pravnog lica/poslodavca registrira na portalu Zavoda.

Rok za registraciju djelatnosti/društva, što podrazumijeva i registraciju na portalu Zavoda za ovu kategoriju aplikanata je 45 dana od dana aktiviranja liste čekanja.

Zavod ili Služba zadržava pravo da u trećem kvartalu godine skрати rok aplikantu za registraciju djelatnosti/društva, uključujući i obavezu registracije na portalu Zavoda.

Rok za zaključenje ugovora, od strane svih potpisnika o sufinansiranju samozapošljavanja je 30 dana od dana izvršene registracije na portalu Zavodu.

13. Pravlđanje i isplata odobrenih sredstava

Nakon potpisivanja ugovora, poslodavac, u pravilu do kraja mjeseca za protekli mjesec, putem e-maila ili drugim pisanim putem Službu obavještava o uplaćenim doprinosima za sufinancirane osobe.

Obavještenje koje poslodavac dostavlja Službi putem e-maila ili drugim pisanim putem, mora sadržavati sljedeće podatke *naziv poslodavca, JIB poslodavca, naziv mjere po kojoj je zaključen ugovor o sufinansiranju zapošljavanja, te ime i prezime, kao i JMB sufinancirane osobe.*

Ukoliko je moguće provjeriti ispunjenost uvjeta na portalu Porezne uprave, za mjesec pravdanja, Služba vrši provjeru i obavještava Zavod o ispunjenim uvjetima za isplatu.

Ukoliko nije moguće provjeriti ispunjenost uvjeta za isplatu na Portalu porezne uprave, za mjesec pravdanja, Služba poziva poslodavca da dostavi dokumentaciju kojom dokazuje ispunjenost uvjeta za isplatu, kako slijedi:

- Specifikacije uz uplatu doprinosa poduzetnika (Obrazac 2002) u slučaju registracije obrta i/ili specifikaciju uz isplatu plaća zaposlenika u radnom odnosu kod pravnih i fizičkih lica (Obrazac 2001) ovjerenu u Poreznoj upravi Federacije BiH, odnosno elektronski Obrazac 2002 i/ili Obrazac 2001 potpisan i ovjeren od strane poslodavca,
- kopiju izvoda iz banke iz kojih je vidljiva isplata pojedinačne bruto plaće (obavezni doprinosi i neto plaća) za sufinanciranu osobu ili u slučaju zbirne uplate plaća kopiju izvoda iz banke iz kojeg je vidljiv iznos zbirne uplate plaća uz spisak sufinanciranih osoba sa pregledom isplata pojedinačnih bruto plaća ovjeren od poslodavca,
- platnu listu za sufinansiranu osobu, potpisanu i ovjerenu od poslodavca.

Nakon izvršene provjere dostavljene dokumentacije, Služba obavještava Zavod o ispunjenim uvjetima za isplatu.

Ukoliko Poslodavac ne dostavi traženu dokumentaciju, Služba dostavlja pisanu opomenu/urgenciju kojom zahtjeva dostavu dokumentacije u roku, ne dužem od 8 dana od dana prijema opomene/urgencije.

Zavod, na osnovu zaprimljene obavijesti od Službe, korisniku isplaćuje/refundira ugovoreni iznos za protekli, opravdani period.

Ukoliko poslodavac ne ispunjava redovno ugovorne obaveze, Zavod, po obavijesti Službe o navedenom, pokreće postupak raskida ugovora, najdalje u roku od 30 dana po isteku perioda na koji su osobe bile sufinancirane o čemu obavještava poslodavca i Službu.

14. Opće napomene

Na sve mjere iz ovog programa u pogledu zaključivanja, trajanja i raskida ugovora o radu analogno se primjenjuju slijedeća pravila:

- Ukoliko poslodavac po bilo kojem osnovu odjavi samostalnu djelatnost/privredno društvo tokom realizacije ugovora o sufinanciranju samozapošljavanja Zavod raskida ugovor o sufinanciranju samozapošljavanja.
- U slučaju raskida ugovora o radu sa osobom koju zapošljava, poslodavac je u obavezi u roku od 15 dana, za preostali period ugovorne obaveze, zaključiti ugovor o radu sa zamjenskom nezaposlenom osobom iz iste kategorije koja mora biti na evidenciji nezaposlenih najmanje dan ranije u odnosu na dan zaključivanja ugovora o radu. U slučaju raskida ugovora o radu sa osobom koju zapošljava, poslodavac je dužan o istom odmah obavijestiti Službu te odmah po eventualno zaključenom ugovoru o radu sa zamjenskom osobom dostaviti isti Službi. Na osnovu navedenog, Služba provjerava na portalu Porezne uprave Federacije BiH da li je poslodavac odjavio osobu s kojom je raskinut ugovor o radu te da li je prijavio zamjensku osobu na obavezna osiguranja u Poreznoj upravi Federacije BiH. Ukoliko je provjerom utvrđeno da poslodavac navedeno nije izvršio ili dostavljena dokumentacija ne bude validna, postupit će se po odredbama Programa, kao u slučaju da poslodavac nije zaposlio zamjensku osobu. Poslodavcu je tokom trajanja ugovora o sufinanciranju dozvoljeno da zaposli najviše jednu (1) zamjensku osobu po svakoj sufinanciranoj osobi.
- U slučaju da poslodavac nije zaključio ugovor o radu sa zamjenskom nezaposlenom osobom obračunat i refundirat će se do tada opravdani iznos sredstava za osobu s kojom je raskinut ugovor o radu. Za eventualno ostale sufinancirane osobe koje nastavljaju svoj radni odnos kod poslodavca, nastaviti će se postupanje u skladu sa zaključenim ugovorom o sufinanciranju.
- U slučaju nastupanja okolnosti da je osoba čije se zapošljavanje sufinancira privremeno spriječena za rad duže od 42 dana ili koristi porodijsko odsustvo, sufinanciranje zapošljavanja se obustavlja za taj period, o čemu poslodavac obavještava Službu. U slučaju povratka na rad osobe po prestanku predmetnih okolnosti, poslodavac za preostali period ima pravo nastaviti koristiti prava određena Programom i ciljem mjere iz ugovora o sufinanciranju zapošljavanja. Služba je u obavezi evidentirati navedene slučajeve te o istom blagovremeno obavijestiti Zavod.
- U slučaju mijenjanja financijske vrijednosti ugovora, radi efikasnosti i ekonomičnosti realizacije Programa, poslodavac je obavezan e-mailom obavijestiti Službu o nastalim promjenama što ugovorne strane prihvaćaju bez posebnih aneksa ugovoru.

- Statusne promjene poslodavca tokom realizacije ugovora o sufinanciranju samozapošljavanja (djelatnost, JIB, organizacijski oblik) nisu dozvoljene, te u slučaju istih Zavod raskida ugovor o sufinanciranju samozapošljavanja.
- Aplikanti koji su nezadovoljni statusom prijave, imaju pravo da ulože prigovor, u roku od osam (8) dana od dana obavijesti o statusu prijave na web portalu Zavoda. Prigovor se podnosi Zavodu u pisanoj formi.
- Sudjelovanjem u Programu, aplikanti su upoznati da Federalni zavod za zapošljavanje, kao kontrolor podataka, obrađuje njihove osobne podatke u svrhu provođenja Programa, u skladu sa Zakonom o zaštiti osobnih podataka. U cilju informiranja javnosti i osiguranja transparentnosti provođenja Programa, Zavod može objaviti na svojoj službenoj web stranici www.fzzz.ba, isključivo ograničeni skup podataka, pri čemu se obrada i objava podataka vrše u obimu nužnom za ostvarenje navedene svrhe i uz primjenu svih propisanih načela zaštite osobnih podataka.

15. Kontrola i praćenje izvršenja ugovornih obaveza

Zavod i Služba će kontinuirano pratiti realizaciju ugovornih obaveza korisnika, i to:

- provjerom podataka na portalu Porezne uprave Federacije BiH,
- provjerom dokumentacije potrebne za zaključivanje ugovora o sufinansiranju samozapošljavanja,
- kontrolom provođenja ugovorenih obaveza.

Ukoliko se praćenjem realizacije ugovorenih obaveza korisnika utvrdi da ih poslodavac ne ispunjava, pokrenut će se postupak raskida ugovora.

16. Indikatori za praćenje realizacije (monitoring) i ocjenu uspješnosti efekata mjera (evaluaciju)

Materijali o monitoringu i evaluaciji Programa će se izrađivati u skladu s Planom monitoringa i evaluacije i sadržavat će sljedeće podatke:

a) Ulazni podaci:

- Osnovni pokazatelji kretanja na tržištu rada,
- Kratak opis Programa (uvjeti Programa, cilj Programa, ciljna grupa, korisnici, visina subvencije, period trajanja subvencije, elementi Javnog poziva),
- Broj osoba na evidenciji nezaposlenih (po strukturnim obilježjima), stanje 31.12.2025. godine,
- Iznos ukupno planiranih sredstava po kantonima/županijama i mjerama Programa.

b) Podaci o aktivnostima – izlazni podaci:

- Aktivnosti u vezi s objavom i provođenjem Javnog poziva),
- Broj zaključenih ugovora s aplikantima,
- Struktura novoregistriranih djelatnosti (osnovna obilježja),
- Broj osoba koje su registrovale djelatnost po mjerama (po strukturnim obilježjima),
- Broj osoba koje su zaposlene u okviru novoregistriranih djelatnosti,
- Ukupna vrijednost zaključenih ugovora po mjerama (planirano, ugovoreno, utrošeno),
- Prosječan iznos poticaja/intervencije po osobi po mjerama.

c) Podaci o učincima mjera iz Programa

- Broj osoba obuhvaćenih mjerama iz Programa koje su zadržale registriranu djelatnost/ ostale zaposlene 12 mjeseci nakon isteka ugovorenog perioda sufinansiranja (samo)zapošljavanja (po strukturnim obilježjima),
- Prosječan trošak po zapošljavanju,
- Nivo izvršenja postavljenih ciljeva.

Ispitivanje zadovoljstva korisnika i mjerenje učinaka kroz anketiranje će se izvršiti (na nivou uzorka određene mjere) u skladu s mogućnostima i raspoloživim kapacitetima.

Kao izvor podataka o realizaciji mjera aktivne politike zapošljavanja i sredstva verifikacije rezultata i mjerenja učinaka, u okviru raspoloživih kapaciteta, koristit će se:

- evidencija korisnika poticaja i izvještaji iz Modula za realizaciju aktivnih politika zapošljavanja u sklopu Jedinog informacionog sistema Federalnog zavoda za zapošljavanje,
- podaci iz portala Porezne uprave Federacije BiH,
- ostala pomoćna sredstva i izvori podataka.